

KEPADA ANGGOTA-ANGGOTA IKHWAN...

Ucapan Selamat Hari Raya

Kepada saudara-saudara anggota Ikhwan,

Terlebih dahulu pihak anggota pimpinan Ikhwan mengucapkan Selamat Hari Raya kepada sekalian ahli-ahli Ikhwan dengan ucapan *mina al- 'āidīn al-fāizīn al-maqbūlīn*.

Kita adalah meminta maaf di atas apa jua kelambatan dan kelengahan terhadap kepada seluruh anggotanya di dalam beberapa tahun ini disebabkan keadaan-keadaan kita sendiri menghadapi beberapa kesulitan dan kepayahan sedang kita tetap di dalam dasar kita bahawa tidak akan meminta apa-apa jua bantuan yang boleh memberatkan kepada anggotanya.

Di dalam masa-masa yang lalu kita telah mencuba membuat risalah-risalah percuma dan meminta kepada ahli-ahli Ikhwan memintanya dengan memberi setem untuknya tetapi sambutan di dalam perkara ini sangat-sangat tidak memuaskan. Kerjasama daripada anggota-anggota ikhwan di dalam hal ini tidak seberapa memberi sambutan. Nampaknya anggota Ikhwan semata-mata berhajat kepada risalah percuma yang dihantarkan dengan percuma sahaja. Untuk ini di dalam beberapa masa yang lalu kita tidak berupaya mengadakannya kerana langkah yang sedemikian ini besar benar bebannya kepada kita kerana untuk setem dan mengerjakan menghantarnya sahaja akan memakan belanja tidak kurang daripada \$500 tiap-tiap kali menghantarnya, iaitu selain daripada harga percetakan risalah itu.

Memandang supaya sentiasa ada perhubungan di antara pengelola Ikhwan dengan ahli-ahlinya maka kita mencari jalan untuk mendapatkan risalah-risalah percuma yang ada perkaitannya

dengan kedudukan umat Islam, terutamanya yang menderita disebabkan perkuasaan sesuatu kekuasaan. Kita rasa kerana ia tidak bertentangan dengan dasar Islam maka tidaklah mengapa, buat sementara kita menghantar risalah yang memperingatkan akan keganasan komunis terhadap Islam dan seterusnya cerita-cerita mengenai pembelaan orang-orang Islam ke atas dirinya sehingga ada yang terpaksa meninggalkan tanah airnya, daripada perkuasaan yang bersifat kebinatangan itu.

Hal ini kita jalan buat sementara sehingga kita sendiri berkemampuan memberi bahan yang baik untuk bacaan dan perhatian kita bersama terhadap kepada perkembangan untuk beringat di dalam kemajuan agama kita.

Risalah yang kita sebut itu, *Inshā-Allah* akan mengunjungi anggota-anggota Ikhwan tidak lama lagi. Mudah-mudahan ia akan memberi manfaat kepada kita bersama. Kita bersetuju mengirimi risalah yang serupa ini kepada semua anggota Ikhwan adalah berpandukan kepada pesanan saudara Muhammad Natsir, Yang Dipertua Masyumi, yang meminta menyebarkan dengan seluas-luasnya riwayat-riwayat orang-orang di Asia Tengah yang dahulunya menjadi sebuah kerajaan Islam yang besar dan orang-orangnya adalah menjadi 'ulama'-'ulama' yang terkenal dan terbilang. Hal mereka jauh daripada pendengaran kita dan kerana itu mustahak kita mengetahuinya dan akan membandingkannya dengan kedudukan kita masa yang akan datang.